

Uunga siunnersut:**Isumaginninnermik suliassaqarfimmi pissaanermik atuineq pillugu Inatsisartut
inatsisaat****Immikkoortoq I
Aalajangersakkat nalinginnaasut****Kapitali 1
Aalajangersakkat aallaqqaasiutaasut**

§ 1. Pissaanermik atuineq qaqtiguiinnaq atorneqartassaaq aamma isumassuinermut inunnillu perorsaanermik ikuunnermut taarsiuullugu atorneqanngisaannassalluni.

Imm. 2. Pissaanermik atuineq anguniarneqartunut naapertuitissaaq. Suliniutit annikinnerusumik akuliuffiusut naammappata, taakku atorneqassapput.

Imm. 3. Pissaanermik atuineq pisariaqarnerpaanuinnaq killilerneqassaaq sapinngisamillu qajassuarnerpaamik sivikinnerpaamillu atorneqassalluni.

Imm. 4. Pisumi piviusumi pissutsinut pissaanermik atuineq naammattusaarneqassaaq.

Imm. 5. Peqataasumik sapinngisaq malillugu qajassuussilluni ataqqinnittumik, ataqqinnissusilimmik aamma innarliinertaqanngitsumik pissaanermik atuineq atorneqassaaq.

Imm. 6. Nikanarsaalluni, asissuilluni imaluunniit allatut nikassaarpasissumik tarnikkut pinninneq inerteqquataavoq.

§ 2. Inatsisartut inatsisaanni matumani ilaatinneqartuni ulloq unnuarlu paaqqinnittarfinni, najugaqarfinni illersugaasuni, ulloq unnuarlu neqeroorutini aamma utoqqarnik paaqqinniffinni, Inatsisartut inatsisaata massuma assilillugu sanaqqinnejnarneranik sulisut tamarmik tigusissapput taassumalu imarisai pillugit ilitsersuunneqassallutik. Sulisup tigusinini imarisaanillu ilitsersuunneqarnini pillugit uppermarsaammik allaganngorlugu atsiussaaq.

Imm. 2. Inatsisartut inatsisaata massuma assilillugu sanaqqinnejnarneranik tunniussinissaq imarisaalu pillugit ilitsersuinissaq aqtsisup taassumaluunniit tullersortaata pisussaaffigaa.

**Immikkoortoq II
Meeqqat**

Kapitali 2

Atuuffissaa nassuaatillu

§ 3. Tulliuttuni taaneqartuni meeqqanut najugaqartunut immikkoortoq II atuuppoq:

1) Ulloq unnuarlu paaqqinnittarfinni, matumani Meeqqat tapersorsorneqarnissaannut Inatsisartut inatsisaat malillugu isumannaallisaavigisamik immikkoortortani najugaqartut ilanngullugit,

2) Inuit innarluutillit tapersorsorneqarnissaannut Inatsisartut inatsisaat malillugu inunnut innarluutilinnut ulloq unnuarlu neqeroorutini najugaqartunut.

Imm. 2. Immikkoortoq II-mi aamma III-mi “ulloq unnuarlu paaqqinnittarfik” pillugu paasinneriaatsimi aamma ilaapput inunnut innarluutilinnut ulloq unnuarlu neqeroorutit meerartaqartut.

Kapitali 3

Suliassat sularineqartarnerat

Nalinginnaasumik

§ 4. Immikkoortoq 1-imi, II-mi aamma III-mi malittarisassat pillugit meeqqap taassumalu illersuisuata ilisimatinneqarnissaat ulloq unnuarlu paaqqinnittarfimmi aqutsisup taassumaluunniit tullersortaata qulakkiissavaa, matumani §§ 67 aamma 69 malillugit, taama tulleriillutik, kommunimi najugaqarfigisami communalbestyrelsimit aamma Isumaginninnermi Naammagittaalliuuteqartarfimmut naammagittaalliuuteqarsinnaaneq ilanngullugit.

Imm. 2. Inuit eqqartuussinertaqanngitsumik namminersorsinnaatitaanerminnik arsaarneqarsimasut pillugit nakkutilliisunut, inatsisip tunngaviusup § 71, imm. 7-ia malillugu pilersinneqartunut, saaffiginnissinnaaneq aammattaaq paasissutissiissutigineqassaaq.

Inersimasut akisussaaffii

§ 5. Meeqqap ulloq unnuarlu paaqqinnittarfimmut inissinneqarnerani, ulluinnarni isumassorneqarnera angajoqqaaniit sulisunut nuunneqartarpoq. Meeqqap soqtigisai qulakkeerniarlugit, sulisut isumassuinerup taassuma isumagineqarnissaanut atatillugu pisariaqartinneqartumik nammineq aalajangiisinnaatitaaneranut akuliussinnaanerat akisussaaffiup taassuma ilaatigut kinguneraa, matumani meeqqap timikkut tarnikkullu pisariaqartitaasa naammassineqarnissaasa qulakkeerneqarnissaat, aamma meeqqap inooqatigiinnut atassuteqarsinnaanermut piginnaaneqalernissaata ineriertortinneqarnissaa, atugarissaarnissaa ilinniagassanillu tigusisinnaanissaa ilanngullugit.

Imm. 2. Meeqqap tunngaviusumik pisinnaatitaaffii aamma meeqqap ukiui, inerisimassusaa piginnaasaalu piviusumik eqqarsaatigilluarlugit isumassuineq isumagineqassaaq.

Meeqcanut ulloq unnuarlu paaqqinnittarfinni pissaanermik atuineq

§ 6. §§ 7 aamma 9-miit 18 ilanngullugu malittarisassat malillugit meeqcanut ulloq unnuarlu paaqqinnittarfinni pissaanermik atuisoqarsinnaavoq.

Imm. 2. Meeqcanut ulloq unnuarlu paaqqinnittarfinni, ulloq unnuarlu paaqqinnittarfiup matui silarliit unnuaanerani aammattaaq parnaarneqarsinnaapput, qaqtiguinnarlu ulluunerani piffissani sivikitsuni parnaarneqarsinnaallutik.

Inissiinerup kingorna ulluni 14-ini anitsaaliugaaneq

§ 7. Ulloq unnuarlu paaqqinnittarfinni, meeqqat inissinneqarnermik kingorna ullut 14-it ulloq unnuarlu paaqqinnittarfimmit pineqartumit anitsaaliugaasinnaanerat pillugu kommunimi angerlarsimaffigisami communalbestyrelse aalajangiisinhaavoq, imaattoqarpas:

- 1) meeqqap immikkut ittumik ikiorneqarnissamut pisariaqartitsinera iliuuseqarfiginiarlugu tamanna annertuumik pingaaruteqartutut isigineqarpat, aamma
- 2) inunnik perorsaanermik suliaqarnermi tamanna aalajangiisumik pingaaruteqartutut nalilerneqarpat.

Imm. 2. Ulluni siullerni 14-ini meeqqap anitsaaliugaanissaani ullut amerlassusissai communalbestyrelsip aalajangissavaa.

Imm. 3. Meeqqap isumai tamatigut ilaatinneqartassapput, qassinillu ukioqarneranut inerisimassusianullu naapertuuttumik tulluartumillu sunniuteqartinneqartassallutik.

Imm. 4. Ulloq unnuarlu paaqqinnittarfimmit aninissaa pinngitsoortinniarlugu, taamaallaat aalajangiullugu tigumminninnikkut timikkut pissaanermik atuilluni meeqqap aninissaa akornuserneqassaaq.

Kapitali 4

Timikkut pissaanermik atuineq

Qilersuineq

§ 8. Qilersuineq inerteqqutaavoq.

Imm. 2. Qitequtinik, paffinnut qilerutinik, isikkanut qilerutinik imaluunniit kiatequtinik aaqanngitsunik sukatertakkanik kiisalu pinngitsaaliinermut atortunik allanik eqqarsaatigeqqaarnagit pinngitsaaliinermut atortunik atuineq, qilersuinermi pineqarput.

Pinngitsoortitsiniarluni ikiuineq

§ 9. Meeqqap pigisanik annertuumik aserorterinissaa imaluunniit aseruinissaa pinngitsoortinniarlugu pisariaqartinneqarpat, aalajangerneqarneratigut imaluunniit inimut allamut ingerlanneqarneratigut sivikitsumik timikkut pissaanermik atuineq akuerisaavoq.

Aalajangiullugu timikkut tigumminninneq

§ 10. Meeqqap aalajangerneqarneratigut imaluunniit inimut allamut ingerlanneqarneratigut timikkut pissaanermik atuineq akuerisaavoq, ima pisoqarpat:

- 1) meeraq ima pissusilersuuteqarpat, inimi ataatsimoorfiusumi najuutiinnarnissaa illersorneqarsinnaanani, imaluunniit
- 2) meeqqap imminut aallanilluunniit ajoqsiinissaa taamatut iliornikkut pinngitsoortinneqassappat.

Uteritsineq

§ 11. Isumassuinissamut pisussaatitaaffimmut atatillugu ulloq unnuarlu paaqqinnittarfimmis sulisut meeraq inissinneqarsimasoq qimaasimasoq utertissinnaavaat, meeraq ima pissusilersorpat, pissusilersuuttaa meeqqamut namminermut imaluunniit allanut ajoqusernermik kinguneqarnissaa aarlerinaateqarluni.

Kapitali 5

Meeqqaanut tarnikkut piginnaasakitsunut systemit kalerrisaarutit systemillu sumiiffissiut inunnut ataasiakkaanut atugassiat

§ 12. Meeqqamut ulloq unnuarlu paaqqinnittarfimmut inissinneqarsimasumut, aammalu tarnikkut annertuumik ataavartumillu piginnaasakitsumut, pisuni immikkut ittuni, ulloq unnuarlu paaqqinnittarfip qinnuteqarneratigut, kommunimi angerlarsimaffigisami kommunalbestyrelsip piffissami killilikkami systemit kalerrisaarutit systemilluunniit sumiiffissiut inunnut ataasiakkaanut atugassiat atorneqarnissaat aalajangersinnaavaa, ima pisoqarpat:

- 1) meeqqap ulloq unnuarlu paaqqinnittarfimmik qimatsinermigut imminut aallanilluunniit timikkut ajoquusernissamut ulorianartorsiotsilernissaa aarlerinaateqarpat,
- 2) systemit kalerrisaarutit systemilluunniit sumiiffissiutit inunnut ataasiakkaanut atugassiat aarlerinartup tamatuma pinngitsoortinnissaanut tapertaasinnaappata, aamma
- 3) systemit kalerrisaarutit systemilluunniit sumiiffissiutit inunnut ataasiakkaanut atugassiat atornissaannut angajoqqaatut oqartussaasut akuersisimappata. Angajoqqaatut oqartussaassuseq ataatsimoorunneqarpat, angajoqqaatut oqartussaasut tamarmik marluullutik akuersisimassapput.

Imm. 2. Imm. 1 malillugu iliuutsit aallartinnissaannut piumasaqaatinik naliliinermi, tulliuttut pigineqarnerat kommunalbestyrelsip qulakkiissavaa:

- 1) pineqartup annertuumik ataavartumillu tarnikkut piginnaasakissusia pillugu suliamut attuumassuteqartumik uppermarsaatit pisariaqartinneqartut,
- 2) suliniuteqarnerup aallartinneqannginnerani perorsaanikkut periaatsit misilinnejqarsimagaluartut pillugit misissuisimaneq, matumani periaatsit siunertap anguneqarnissaannut qanoq ilillutik naammassimannginnerat pillugu misissuisimaneq ilanngullugu, aamma
- 3) meeqqap ulloq unnuarlu paaqqinnittarfiup avataani nammineerluni aneersinnaanngornissaa misilinniarlugu, suliniuteqarnerup peqatigisaanik perorsaanikkut periaatsit suut atorneqartussat pillugit misissuisimaneq.

Imm. 3. Imm. 1 malillugu iliuutsip aallartinnissaanut piumasaqaatit eqortinnejqarsimanerannik naliliinermi, meeqqap ukioqqortussusianut inerisimassusianullu naapertuutumik meeqqap isummersuutai naammaginartumik pingaartinneqjarsimanersut kommunalbestyrelsip ilanngullugu nakkutigissavaa.

§ 13. § 12 malillugu systemit kalerrisaarutit systemilluunniit sumiiffissiut inunnut ataasiakkaanut atugassiat annerpaamik qaammatit 4-kaarlugit atorneqarsinnaapput. Pisuni ataasiakkaanni aalajangersimasumik naliliineq tunngavigalugu piffissaq atuiffiusussaq aalajangerneqartassaaq. Suliniuteqarnerup atorneqarnissaanik aalajangiinermi piumasaqaatit eqortinnejqarsinnaajunnaarpata, suliniut unitsinneqassaaq.

§ 14. § 12 malillugu systeminik kalerrisaarutinik systeminilluunniit sumiiffissiutinik inunnut ataasiakkaanut atugassanik atuinissamut aalajangiisinnanermi, atortut meeqqap sumiiffiinik ataavartumik nakkutiginninnermut atorneqarsinnaasut ilaangillat.

Kapitali 6

Meeqqap inuttaanik inimillu sumiiffigisaanik misissuineq

Nalinginnaasumik

§ 15. Ulloq unnuarlu paaqqinnittarfinni, meeqqap pigisanik tigussaasunik pigisaqarneranik isumaqarnissamut aalajangersimasunik tunngavissaqarpat, pigisaqarnerullu torersuutitsinissaq pillugu aalajangersakkat malinneqjarsinnaannginnerat, imaluunniit isumannaallisaanikkut mianerisassat mianerineqjarsinnaannginnerat kingunerissappagu, paaqqinnittarfiup aqutsisuata taassumaluunniit tullersortaata, meeqqap inuttaanik inimillu sumiiffigisaanik misissusoqarnissaa eqqartuussinertaqanngitsumik aalajangersinnaavaa.

Imm. 2. Misissuinerup meeqqamut kanngunarsarneqarnermik iluaalliorstinnejqarnermillu pissutaanissaa misissuinermillu siunertarineqartut atsikkutigiippata, imm. 1 malillugu misissuineq aatsaat ingerlannejqassaaq. Iliuuseqarnerit allat sakkukinnerusut misilinnejqareersimanissaat, taakkulu misissuinermut siunertat angunissaannut naammassimannginnerisa takuneqjarsinnaasimanerat, misissuinissamut piumasaqaataavoq.

Meeraq pigisanik tigussaasunik tigummiagaqarsimappat tigummiaminik nammineq tunniunnissaannut kaammattorneqassaaq.

Imm. 3. Pissutsit aallaavigalugit sapinggisamik qajassuartumik misissuineq ingerlanneqassaaq. Taamaalluni meeqqap kanngunarsagaasutut misiginera sapinggisamik annikinnerpaasunngorlugu misissuineq ingerlanneqassaaq.

Imm. 4. Pissutsit immikkut ittut misissuinnissamut pissutaasunik paasitsinissaq ajornartinnngippassuk, meeqqap inuttaanik inimilluunniit sumiiffigisaanik misissusoqalersinnagu, misissuinerup aallartinneqarneranut pissutaasunik meeraq paasitinneqarnissamut pisinnaatitaaffeqarpoq.

Imm. 5. Meeqqap inuttaanik inimilluunniit sumiiffigisaanik misissuinermi sulisut ikinnerpaamik 2 tamatigut peqataasassapput. Taamaattoq pissutsit immikkut ittut pisariaqartippassuk, misissuineq sulisumit 1-imit ingerlanneqarsinnaavoq. Meeqqap inuttaanik inimilluunniit sumiiffigisaanik misissuinermi meeqqanik allanik najuuttoqaqusaanngilaq.

Imm. 6. Pissutsit torersuunissamut isumannaatsuunissamulluunniit tunngasut pissutigalugit arsaarinninnissaq pisariaqartinneqartutut nalilerneqarpat, tigussaasumik pigisat meeqqap pigisaatut nassaarineqartut arsaarinnissutigineqarnissaat ulloq unnuarlu paaqqinnittarfiup aqtsisuata taassumaluunniit tullersortaata aalajangersinnaavaa.

Imm. 7. Pigisat meeqqap pigisai arsaarinnissutigineqarpata, ulloq unnuarlu paaqqinnittarfimmi aqtsisoq taassumaluunniit tullersortaa, pigisat arsaarinnissutigineqartut allattorsimaffiannik suliaqassaaq. Arsaarinnissutiginnineq pillugu meeraq ilisimatinneqassaaq, allattukkallu assilineqarnera meeqqamut kommunimullu angerlarsimaffigisamut tunniunneqassalluni.

Imm. 8. Pigisaq inissiiffigisap pigippagu, ingerlaannaq arsaarinnissutigineqarsinnaavoq.

Init sumiiffigisat misissorneqarnerat immikkut pillugit

§ 16. Meeqqap misissuinermi najuunnissaanut misissuinerulluunniit kingorna ergerluni misissuineq inernerilu pillugit nassuaanneqarnissaanut, pissutsit immikkut ittut ajornartinnngippassuk, meeqqap inimik sumiiffigisaani misissuineq inimi sumiiffigisami meeqqap tigussaasumik pigisaanik misissuinermit kinguneqarpat, meeraq misissuinermi najuunnissamut neqeroorfingineqassaaq, misissuinerulluunniit kingorna ingerlaannaq misissuineq inernerilu pillugit nassuaanneqassalluni.

Imm. 2. Ini sumiiffigisaq pillugu ini, sikaaviit ineqqalluunniit allat meeqqap atorsinnaasai pineqarput. Pigisat pillugit assersuutigalugu inimi sumiiffigisamiittut siniffiit, amusarissat, toqqorsiviit matusartut, taskit pooqattallu pineqarput.

Meeqqap inuttaanik misissuineq immikkut pillugu

§ 17. Meeqqap inuttaanik misissuinermi akuliunnerit, inuup timaanut pulatitsinertaqanngitsut, timimillu imatut attuuaninnertaqanngitsut pineqarput. Taamaallaat

atisat qaavisigut pattalaarisoqarsinnaavoq aammalu kaasarfiit kamippaallu misissorneqarsinnaallutik. Meeqqalli qaatiguuminik peersinissaa, nasaarnissaa kamillaarnissaalu ulloq unnuarlu paaqqinnitarfiup sulisuisa piumasarisinnaavaat.

Imm. 2. Meeqqap timimini pigisanik tigussaasunik sunik peqarneranik misissuineq, inunnit meeqqamit aallaanermik suaassuseqartunit taamaallaat qaqutigorluinnaq suliarineqarsinnaavoq najuuffigineqarsinnaallunilu.

Kapitali 7

Allaffigeqatigiittarnernik, oqarasuaatitigut oqaloqatigiinnernik allatigullu attaveqaqatigiinnernik nakkutilliineq

§ 18. Meeqqap peqqinnissaa ineriarorneralu eqqarsaatigalugit tamanna pisariaqarpat, ulloq unnuarlu paaqqinnitarfinni allaffigeqatigiinnernik, oqarasuaatikkut oqaloqatigiinnernik allatigullu inunnik erseqqinnerusumik taaneqartunik paaqqinnitarfiup avataaniittunik attaveqaqatigiinnernik piffissami aalajangersimasumi eqqartuussinertaqanngitsumik nakkutilloisoqarnissaa, kommunimi angerlarsimaffigisami communalbestyrelsip aalajangersinnaavaa, taamaattoq imm. 2-6 takukkit.

Imm. 2. Meeraq akuersiteeqqaarlugu najuutsillugulu aatsaat allakkanik isertunik anisunillu ammaasoqarsinnaavoq. Meeraq akuersisimatillugu tusarnaaqataassutit atorlugit oqarasuaatikkut oqaloqatigiinnernik nakkutilliinerit taamaallaat pisinnaapput. Tusarnaaqataassutit atorlugit tusarnaartoqarpat, tamanna pillugu inuk oqaloqatigineqartoq ilisimatinneqassaaq.

Imm. 3. Allakkap isertup ammarneqarnissaa meeqqap kissaatiginngippagu, taanna allakkiamik nassuaammik ilallugu ammarnagu nassiussisumut utertinneqarsinnaavoq. Allakkap anisup ammarneqarnissaa meeqqap kissaatiginngippagu, allagaq suujunnaartinneqassaaq.

Imm. 4. Meeqqap sianerfigitinnermini tusarnaaqataassutinik tusarnaartoqarnissaa kissaatiginngippagu, sianersimasoq nassuaateqarfialugu oqarasuaatikkut oqaloqatigiinnej kipitinneqarsinnaavoq. Meeqqap sianernermini tusarnaaqataassutinik tusarnaaqataasoqarnissani kissaatiginngippagu, oqaloqateqarnissaa pissanngilaq.

Imm. 5. Pisortat oqartussaasuinit pisortallu oqartussaasuinit eqqartuussissuserisoqarsimagunilu eqqartuussissuserisuanut eqqartuussissuserisuanilluunniit imaluunniit, meeqqap illersuisuanut illersuanilluunniit, allakanut allatigullu saaffiginnissutinut imm. 1-imiit 4 ilanngullugu atuutinngillat.

Imm. 6. § 26 malillugu eqqartuussisarnermk inatsit malillugu politiit suliaminnut atatillugu nakkutiliitillugit, politiit pulaartunik, allaffigeqatigiittarnernik, oqarasuaatikkut oqaloqatigiinnernik allatigullu attaveqaqatigiinnernik nakkutilliineranni imm. 1-imiit 5 ilanngullugu atuutinngillat.

Kapitali 8

Nalunaarsuineq nalunaarutiginninnerlu

Nalinginnaasumik

§ 19. Pissaanermik atuinerit assigiinngitsut tamarmik nalunaarsorneqassapput, kommunimilu najugaqarfigisami aamma kommunimi angerlarsimaffigisami kommunalbestyrelsimit aamma Naalakkersuisunut, kiisalu meeqqat ataasiakkaat taamaattoqarpata, meeqqatut illersuisuannut imaluunniit inuttut innarluutilittut illersuisuannut ulloq unnuarlu paaqqinnittarfimmit nalunaarutigineqassapput.

Imm. 2. Inatsisartut inatsisaat manna malillugu nalunaarutiginninnissamut immersugassaq Naalakkersuisut suliarissavaat. Ulloq unnuarlu paaqqinnittarfiit taakkuninnga atuinissamut pisussaaffeqarput.

Akuerisaasumik timikkut pissaanermik atuinerup nalunaarsorneqarnera

§ 20. Ulloq unnuarlu paaqqinnittarfinni §§ 9-miit 11 ilanngullugu, kiisalu allatut ajornartumik illersuisariaqalerneq aamma illersuisinnaataaneq pillugit Pinerluttulerinermi inatsimmi kapitali 2-mi aalajangersakkat malillugit, timikkut pissaanermik atuineq pillugu ulloq unnuarlu paaqqinnittarfiup aqutsisuata, imaluunniit taassuma tullersortaata, akuliunnerup pereersimaneranit nalunaaquttap akunneri 24-t qaangiutsinnagit paasissutissat tulliuttut, nalunaarutiginninnissamut immersugassamut siunertamut tassunga suliarineqarsimasumut, nalunaarsussavai:

- 1) Meeqqap aqqa qassinillu ukioqarnera.
- 2) Akuliunnermi piffissap qanoq ilinera.
- 3) Akuliunnerup qanoq sivisutiginera.
- 4) Akuliunnerup suussusia.
- 5) Kina akuliuttuusimanersoq
- 6) Akuliunnermut tunngavilersuutit.

Imm. 2. Meeraq akuliuffigineqartoq nalunaarutiginninneq pillugu ilisimatinneqassaaq, pisimasumullu nammineq nassuaamminik ilanngussinissamut periarfissaqassalluni. Meeraq illersuisumit, inummit toqqisisimaffigisamit isumassuismilluunniit, imaluunniit ulloq unnuarlu paaqqinnittarfimmi sulisumit, pisimasumi akuusimangitsumit nalunaarsuinermut oqaaseqaatiminik suliaqarnissaminut ikiorneqarnissamik neqeroorfigineqassaaq.

Imm. 3. Ulloq unnuarlu paaqqinnittarfimmi protokolimi tassunga immikkut naatsorsuussami nalunaarutiginninnissamut immersugassaq pigineqassaaq.

Imm. 4. Ulloq unnuarlu paaqqinnittarfiup aqutsisuata taassumaluunniit tullersortaata nalunaarutiginninnermut immersugassap assilineqarnera nammineq oqaaseqaatiminik ilallugu kommunimut najugaqarfigisamut, kommunimut angerlarsimaffigisamut, Naalakkersuisunut

taamaattoqarpallu meeqqap meeqqattut illersuisuanut imaluunniit inuttut innarluutilittut illersuisuanut akuliunnerup pereersimaneranit ullut 3 qaangiutsinnagit nassutiissavaa.

Inummik inimillu isersimaffigisaanik misissuinerup nalunaarsorneqarnera

§ 21. §§ 15-imii 17 ilanngullugu aalajangersakkat malillugit meeqqap inuttaanik imaluunniit inimik isersimaffigisaanik misissuinermi ulloq unnuarlu paaqqinnittarfimmi aqutsisup taassumaluunniit tullersortaata, akuliunnerup pereersimaneranit nalunaaquttag akunneri 24-t qaangiutsinnagit paassisutissat tulliuttut, nalunaarutiginninnissamut immersugassamut siunertamut tassunga suliarineqarsimasumut, nalunaarsussavai:

- 1) Meeqqap aqqa qassinillu ukioqarnera.
- 2) Misissuineq qanga pisimanersoq.
- 3) Misissuinerup sivisussusia.
- 4) Misissuinerup suussusia.
- 5) Kina misissuisuusimanersoq.
- 6) Misissuinermut pissutaasoq.
- 7) Pigisat tigussaasut suut nassaarineqarsimanersut.

Imm. 2. Meeraq inuttaminik imaluunniit ininik isersimaffigisaanik misissuiffigineqartoq, nalunaarutiginninneq pillugu ilisimatinneqassaaq, misissuinerlu pillugu nammineq nassuaamminik ilanngussinissamut periarfissaqassalluni. Meeraq illersuisumit, inummit toqqisisimaffigisamit isumassuisumilluunniit, imaluunniit ulloq unnuarlu paaqqinnittarfimmi sulisumit, pisimasumi akuusimanngitsumit, nalunaarutiginninnermut oqaaseqaatiminik suliaqarnissaminut ikiorneqarnissaminik neqeroorfingineqassaaq.

Imm. 3. Ulloq unnuarlu paaqqinnittarfimmi protokolimi, tassunga immikkut naatsorsuussami, nalunaarutiginninnissamut immersugassaaq pigineqassaaq.

Imm. 4. Ulloq unnuarlu paaqqinnittarfiup aqutsisuata taassumaluunniit tullersortaata nalunaarutiginninnermut immersugassap assilineqarnera oqaaseqaatinik ilallugu kommunimut najugaqarfigisamut, kommunimut angerlarsimaffigisamut, Naalakkersuisunut, taamaattoqarpallu, meeqqap meeqqatut illersuisuanut imaluunniit inuttut innarluutilittut illersuisuanut, misissuinerup pereersimaneranit ullut 3 qaangiutsinnagit nassutiissavaa.

Pissaanermik atuineq akuerineqanngitsoq

§ 22. §§ 8-miit 18 ilanngullugu malittarisassanik unioqqutitsinerit nalunaarsorneqassapput, aamma kommunimut najugaqarfigisamut, kommunimut angerlarsimaffigisamut Naalakkersuisunullu meeqqallu illersuisuanut, immersugassamut siunertamut tassunga suliarineqarsimasumut, nalunaarutigineqassallutik.

Imm. 2. Pisuni imm. 1-imti taaneqartuni sulisoq akuusoq, kingusinnerpaamik pisimasup aqaguani, tamanna pillugu aqutsisup nammineq oqaaseqaataanik inuillu pisimasumik takunnittut oqaaseqataannik ilallugu, ulloq unnuarlu paaqqinnittarfiup aqutsisuanut imaluunniit tullersortaanut allakkatigut nalunaarutiginnissaaq. Imm. 1 malillugu nalunaarutiginninneq pisup pereersimaneranit ullut 3 qaangiutsinnagit nassiuunneqassaaq.

Nalunaarutiginninneq paasissutissanik tulliuttunik imaqassaaq:

- 1) Meeqqap aqqa qassinillu ukioqarnera.
- 2) Iliuutsip akuliunnissamut tunngavissiisup piffissap qanoq ilinerani pisimanera.
- 3) Piffissap qanoq ilinerani akuliunnerup pisimanera.
- 4) Akuliunnerup qanoq sivisutiginera.
- 5) Akuliunnerup suussusianik allaatiginninneq.
- 6) Akuliunnerup siunertaanik allaatiginninneq.
- 7) Kina akuliuttuusimanersoq.
- 8) Piffissami akuliunnerup pinerani meeqqap qanoq issusia.
- 9) Pissutsit immikkut ittut, akuliunnissamut tunngavissiisut.

Imm. 3. Meeraq pisimasumut pissaanermik atuinissamut tunngavissiisumut akuusoq, nalunaarutiginninneq pillugu ilisimatinneqassaaq, pisimasorlu pillugu nammineq nassuaatiminik ilanggussinissamut periarfissaqassalluni. Meeraq illersuisumit, inummit toqqisisimaffigisamit isumassuisumilluunniit, imaluunniit ulloq unnuarlu paaqqinnittarfimmi sulisumit, pisimasumi akuusimanngitsumit, nalunaarsuinermut oqaaseqaatiminik suliaqarnissaminut ikiorneqarnissamik neqeroorfigineqassaaq.

Imm. 4. Sulisoq alla, pisumik isiginnaartuusimasoq, aqaguanilu nalunaarutiginninnermut paasissutissanik piumaffigineqarsimanngitsoq, ulloq unnuarlu paaqqinnittarfip aqtsisuanut taassumaluunniit tullersortaanut nassuaateqarnissaminik pisussaaffeqarpoq.

Imm. 5. Sulisoq alla, pisimasoq pillugu tunngavissaqartumik ilisimasaqalersoq, ilisimasat taakku pillugit ulloq unnuarlu paaqqinnittarfip aqtsisuanut taassumaluunniit tullersortaanut aammattaaq nalunaarnissamut pisussaaffeqarpoq.

Imm. 6. Ulloq unnuarlu paaqqinnittarfimmi aqtsisoq taassumaluunniit tullersortaa, nalunaarutiginninnerup peqatigisaanik nalunaarutiginninnerup assilineranik sulisumut akuusumut tunniussissaaq.

Imm. 7. Sulisoq akuusoq tassaappat ulloq unnuarlu paaqqinnittarfip aqtsisua, imm. 1 malillugu aqtsisup tullersortaata nalunaarutiginninneq nassiuressavaa. Pisumi taamatut ittumi ulloq unnuarlu paaqqinnittarfimmi tullersortip, nalunaarutimi assilinera ulloq unnuarlu paaqqinnittarfip aqtsisuanut tunniutissavaa.

Imm. 8. Nalunaarutiginninnermik suliap tiguneqarneraniit sapaatit akunneri 6 qaangiutsinnagit nalunaarutiginninneq ingerlatsinermut qanoq kinguneqassanersoq Naalakkersuisut aalajangissavaat.

§ 23. §§ 8-miit 18 ilanngullugu malittarisassat unioqqutitsiffiunerannut atatillugu, pisortanit unnerluussutaasinnaallunilu pineqaatisiissutaasinnaasutut tunngavissaqartumik pinerluttuliorqarsimaneranik pasitsaassisqarpal, ulloq unnuarlu paaqqinnittarfip aqtsisuata taassumaluunniit tullersortaata, tamanna pillugu ingerlaannaq kommunimut najugaqarfigisamut, kommunimut angerlarsimaffigisamut Naalakkersuisunullu nalunaarut nassiuressavaa. Kommunip najugaqarfigisap politit ingerlaannaq attaveqarfigissavaat.

Immikkoortoq III

**Pinerluutillit pillugit eqqartuussivinni suliat tunngavigalugit pineqaatissiineq
tunngavigalugu meeqqat inissinneqartut aamma kommunalbestyrelsip
aalajangiineratigut meeqqat isumannaallisaavigisamik immikkoortortaqarfimmi
inissinneqartut**

Kapitali 9

Atuuffia

- § 24.** Meeqqanut ulloq unnuarlu paaqqinnittarfinni imaluunniit inunnut innarluutilinnut ulloq unnuarlu neqeroorutini inissinneqarsimasunut immikkoortoq III atuuppoq:
- 1) Pinerluttulerinerimi inatsimmi kapitali 32 malillugu eqqartuussineq imaluunniit eqqartuussiviup tamanna pillugu aalajangiinera malillugu inissinneqarsimasunut,
 - 2) Tigummigallagaanermut atatillugu, tassani eqqartuussisarnermik inatsimmi § 361, imm. 2 nr. 3 malillugu, § 359 malillugu tigummigallagaanermut atatillugu isumannaallisaavigisamik immikkoortumi inissiinissaq eqqartuussivimmit aalajangerneqarnerata kingorna meeqqanut ulloq unnuarlu paaqqinnittarfimmi naleqquttumi inissinneqarsimasunut,
 - 3) Meeqqat tapersorsorneqarnissaannut Inatsisartut inatsisaanni § 30, imm. 1 aamma imm. 2, nr. 3 aamma § 36, imm. 1 malillugu communalbestyrelsip ulloq unnuarlu paaqqinnittarfimmi isumannaallisakkamik immikkoortortami inissiinissamik aalajangiineranut atatillugu inissinneqarsimasunut, imaluunniit
 - 4) Pinerluttulerinerimi inatsimmi § 234 malillugu inissiisarfimmi pillaatisiamik atuinissamiit, Pinerluttunik Isumaginnittut aalajangiinerat malillugu ulloq unnuarlu paaqqinnittarfimmur imaluunniit inunnut innarluutilinnut ulloq unnuarlu neqeroorummut nuussinikkut inissinneqarsimasunut.

§ 25. §§ 29 aamma 30 malillugit meeqqanut ulloq unnuarlu paaqqinnittarfinnut inissinneqarsimasunut akuliunnissaq pillugu aalajangiisoqarsinnaavoq, matumani immikkoortut isumannaallisakkat imaluunniit inunnut innarluutilinnut ulloq unnuarlu neqeroorut ilanngullugit, matumani § 24 malillugu ulloq unnuarlu neqeroorutit isumannaallisakkat ilanngullugit.

Eqqartuussisarnermik inatsit malillugu tigummigallagaanermut atatillugu inissiineq

§ 26. Eqqartuussisarnermik inatsimmi malittarisassani § 361, imm. 2, nr. 3 malillugu meeqqanut § 359 malillugu ulloq unnuarlu paaqqinnittarfinnut inissinneqarsimasunut, matumani immikkoortoq isumannaallisagaq ilanngullugu, pulaartarnerit, allaffigeqattaannerit il. il. pillugit eqqartuussisarnermik inatsimmi §§ 379, 380 aamma 381 assigisaanik atuupput.

Imm. 2. Ukunannga nakkutigisaanngitsumik aallaffigeqattaannerit pulaarneqarnerillu meeqqap pisinnaatitaaffigaa:

- 1) meeqqap kommunimi najugaqarfingisaani- aamma kommunimi angerlarsimaffigisaani communalbestyrelsini ilaasortanit,
- 2) Naalakkersuisuni ilaasortanit,

- 3) Inatsisartuni ilaasortanit,
- 4) pisortani oqartussananit allanit
- 5) eqqartuussivimmit,
- 6) unnerluussisussaatitaasunik,
- 7) politiinit,
- 8) meeqqap illersuisuanit,
- 9) meeqqap meeqqatut illersuisuanit,
- 10) Inatsisartut Ombudsmandiannit,
- 11) Folketingip Ombudsmandianit,
- 12) Europami Inuit pisinnaatitaaffii pillugit eqqartuussivianit,
- 13) Europami Naalliuutsitsisarneq pillugu ataatsimiititaliamit,
- 14) Meeqqat Illersuisuanit, aamma
- 15) Inuit innarluutillit Illersuisuanit.

Imm. 3. Tigummigallagaanissaq eqqarsaatigalugu piissutit immikkut ittu piissutigalugit politiit akerliunngippata, meeraq nunamit allameersoq, nunami angerlarsimaffigisami nunanut allanut attaveqaataanik imaluunniit konsuulitut sinniisuinik nakkutigisaanngitsumik aammattaaq aallaffigeqateqartarsinnaavoq. Imm. 1 malillugu politiit allakkanik nakkutiliinissaq aalajangersimappassuk, allakkat politiit aqqutigalugit nassiunneqassapput.

Imm. 4. Imm. 1 malillugu politiit aalajangiinerat pillugu meeraq ilisimatinneqassaaq, meeqqallu tamatuma aalajangiiffigineqarnissaa pillugu eqqartuussivimmi saqqummiunneqarnissaa piumasarisinnaavaa.

Imm. 5. Ulloq unnuarlu paaqqinnittarfipi aqutsisuata imaluunniit taassuma tullersortaata imm. 1 malillugu piumasaqaatit aalajangersarneqartut pillugit ulloq unnuarlu paaqqinnittarfipi sulisuinik ilisimatitsinissaq isumagissavaa.

Kapitali 10

Suliassat suliarineqartarnerat pillugu malittarisassat

Oqartussaaneq

§ 27. Ulloq unnuarlu paaqqinnittarfimmi aqutsisoq, taassumaluunniit tullersortaa, §§ 29-imi aamma 30-imi akuliunnerit taaneqartut pillugit aalajangiissaq.

Imm. 2. §§ 29 aamma 30 malillugit akuliunneq ulloq unnuarlu paaqqinnittarfimmi sulisunit ingerlanneqarsinnaavoq.

Imm. 3. Akuliunnernik annikinnerusunik suliniuteqarnikkut siunertap naleqquttumik anguneqarsinnaannginnera akuliunnerup siunertarissagaa, §§ 29 aamma 30 malillugit akuliunnissamik aalajangiinissamut piumasaqaataavoq.

Akuliunnerup annertussusaa

§ 28. Akuliunnissamut piumasaqaatit atuukkunnaarpata, akuliunnerit aallartinneqartut erngerlutik unitsinneqassapput.

Imm. 2. § 25 malillugu aqutsisoq, imaluunniit taassuma tullersortaa akuliunnissamik aalajangiisimasoq, akuliunnerup aallartinneqarsimasup unitsinneqarnissaanut tunngatillugu ingerlaavartumik nalilersuissaaq.

Kapitali 11

Akuliunnerit ataasiakkaat

Immikkoortitaaneq

§ 29. Meeqqap imminut ajoquusernissaa imaluunniit allanik ajoqusiinissaa ilungersunartorujussuarmik aarlerinaateqarpat, avinngarusimasumi ineqqami immikkoortitsivimmi meeqqap inissinneqarnissa ulloq unnuarlu paaqqinnittarfiup aqtsisuata, taassumaluunniit tullersortaata, aalajangersinnaavaa.

Imm. 2. Imm. 1 malillugu immikkoortitaaneq sapinngisamik sivikinnerpaamik qajassuarnerpaamillu pissaaq kiisalu nalunaaquttap akunnerinit 2-nit sivisunerusinnaanani.

Imm. 3. Meeraq immikkoortitsivimmi inissinneqartoq ingerlaavartumik nakkutigineqassaaq.

Imm. 4. Ineeraq immikkoortitsivik video atorlugu atasuinnarmik nakkutigineqarsinnaavoq.

Imm. 5. Ineqqanik unnuakkut parnaaqqatitsisarneq immikkoortitsivimmiititsinerunngilaq.

Unnuaanerani parnaaqqatitsineq

§ 30. Pissutsit torersuunissamut- imaluunniit isumannaatsuunissamut tunngassuteqartut eqqarsaatigalugit ulloq unnuarlu paaqqinnittarfimmi aqtsisup taassumaluunniit tullersortaata meeqqap ineraanik unnuakkut parnaarsisarsinnaanera pillugu kommunimi angerlarsimaffigisami communalbestyrelse akuersissuteqarsinnaavoq.

Imm. 2. Imm. 1 malillugu akuersissut atorneqarpat, ineqqap parnaaqqanerani meeraq sulisunik attaveqarsinnaasussaavoq.

Kapitali 12

Nalunaarsuineq nalunaarutiginninnerlu

§ 31. §§ 29 aamma 30 malillugit akuliunnerit suulluunniit aallartinneqarsimasut, akuliunnerup pereersimaneranit nalunaaquttap akunnerisa 24-t iluanni paasissutissat tulliuttut, nalunaarutiginnissamut immersugassamut siunertamut tassunga suliarineqarsimasumut, nalunaarsorneqassapput. Nalunaarsuineq pissutissaqanngitsumik uninnganani ulloq unnuarlu paaqqinnittarfiup aqtsisuata, taassumaluunniit tullersortaata, Naalakkersuisunut nalunaarutigissavaa. Nalunaarsuineq paasissutissanik tulliuttunik imaqassaaq:

- 1) Meeqqap inissinneqarsimasup aqqa ukiuilu.
- 2) Akuliunnermi piffissap qanoq ilinera.
- 3) Akuliunnerup sivisussusaa.
- 4) Akuliunnerup suussusia.
- 5) Kina akuliuttuunersoq.

6) Akuliunnermut tunngavilersuut.

Imm. 2. Inissinneqartoq akuliunnermut pissutaasoq, nalunaarsuineq pillugu ilisimatinneqassaaq taassumunngalu nammeneq nalunaajaamminik ilaqaqtitsinissaminik periarfissinneqassalluni.

Imm. 3. Ulloq unnuarlu paaqqinnittarfiup aqutsisuata taassumaluunniit tullersortaata, qaammatip naanerani nalunaarsuinerit assilineqarnerat, nammeneq oqaaseqaatiminik ilallugit, imm. 1 malillugu Naalakkersuisunut nassutissavai.

Immikkoortoq IV

Inersimasut

Kapitali 13

Atuuffissaat nassuaatillu

§ 32. Immikkoortoq IV-mi malittarisassani ilaapput inuit 18-ileereersimasut aamma annertuumik ataavartumillu tarnikkut pisinnaasakillisimasut, aammalu ukunani:

- 1) Inuit innarluutillit tapersorsorneqarnissaannut Inatsisartut inatsisaat malillugu najugaqarfimmi illersugaasumi najugaqartut,
- 2) Inuit innarluutillit tapersorsorneqarnissaannut Inatsisartut inatsisaat malillugu ulloq unnuarlu neqeroorummi najugaqartut, imaluunniit
- 3) Utoqqarnik paaqqinniffiit il. il. pillugit Inatsisartut peqqussutaat malillugu utoqqarnik paaqqinniffimmi najugaqartut.

Imm. 2. Imm. 1, nr. 1-imiit 3 ilanngullugu malillugit, Inatsisartut inatsisaanni oqaaseq “najugaqarfifit” atorneqartillugit, najugaqarfifit illersugaasut, ulloq unnuarlu neqeroorutit aamma utoqqarnik paaqqinniffiit tassani pineqarput.

Kapitali 14

Suliassat suliarineqartarnerat, allaffissorneq il.il.

Nalinginnaasumik

§ 33. Inuit immikkoortuni IV-mi V-milu malittarisassani ilaatinneqartut, malittarisassat pillugit paasitinneqarnissaat najugaqarfimmi aqutsisup taassumaluunniit tullersortaata qulakkiissavaa, matumani §§ 67 aamma 69 malillugit kommunimi angerlarsimaffigisami communalbestyrelsimit aamma Isumaginninnermi Naammagittaalliuuteqartarfimmuit naammagittaalliuuteqarsinnaaneq ilanngullugit. Inuk nammineerluni malittarisassanik atuisinnaangippat, § 66 malillugu naammagittaalliorssinnaatitaasoq naammagittaalliorssinnaatitaasulluunniit malittarisassat pillugit ilisimatinneqassapput.

Imm. 2. Inuit eqqartuussinertaqanngitsumik nammineersinnaatitaanerannik arsaarinniffigineqarsimasut pillugit, tunngaviusumik inatsimmi § 71, imm. 7 malillugu nakkutilliisunut pilersinneqarsimasunut saaffiginnissinnaaneq pillugu aammattaaq nalunaaruteqartoqassaaq.

Kommunalbestyrelsip aalajangernissaanut tunngaviit

§ 34. §§ 38-miit 42 ilanngullugu malillugit kommunalbestyrelsip aalajangerneranut tunngavittut pigineqassapput:

- 1) tarnikkut pisinnaasakillisimaneq pillugu suliamut tunngatillugu uppernarsaatit pisariaqartinneqartut,
- 2) suliniutip aallartinneqarnissaa pillugu aalajangiinissaq eqqarsaatigineqartoq aalajangerneqartinnagu, inunnik perorsaanerit paaqqutaqarinninnerillu aallartinneqarsimasut pillugit paassisutissat,
- 3) suliniutip qanoq sivisutigisumik pisariaqartinneqarnissaanik naatsorsuutiginneq pillugu paassisutissat, aamma
- 4) qanigisaasut angajoqqaatulluunniit akisussaatitaasoqarpat angajoqqaatut akisussaatitaasup suliniummut eqqarsaatigineqartumut oqaaseqaataa.

Nalilfersueqqinnej

§ 35. Suliani § 41, imm. 1, § 41 imm. 1 aamma § 43 malillugit suliniuteqarnermik aallartitsiffiusuni, suliniutip atorneqarnerata ingerlaqqinnissaa kommunalbestyrelsimit ataavartumik nalilersoqqinnejartassaaq, taamaattorli suliniutip aallartinneqarnissaanik kommunalbestyrelsip aalajangiineraniit kingusinnerpaamik qaammatit 8 qaangiutsinnagit tamanna pissalluni.

Imm. 2. Suliani § 40 malillugu suliniuteqarnermik aallartitsiffiusuni, suliniutip atorneqarnerata ingerlaqqinnissaa kommunalbestyrelsimit ataavartumik nalilersoqqinnejartassaaq, taamaattoq suliniutip aallartinneqarnissaanik kommunalbestyrelsip aalajangiineraniit kingusinnerpaamik qaammatit 18 qaangiutsinnagit tamanna pissalluni.

Najugaqarfinni akuersissuteqaqqaarani tigutinnej

§ 36. Inuup nuunnissamut akerliusup imaluunniit tamatumunnga paasinartumik akuersinissamut pisinnaasaqanngitsup, § 37, imm. 1 malillugu isumaginninnermut inatsisit malillugit najugaqarfimmut aalajangersimasumut tigutinnissaa aalajangiiffigeqqullugu, kommunimi angerlarsimaffigisami kommunalbestyrelsip Naalakkersuisunut innersuussutigisinnavaa, imaattoqarpat:

- 1) pineqartup pisariaqartitaminik ikiorneqarsinnaanissaanut tamanna pisariaqarluinnarpat,
- 2) ikiuineq inuup maannamut angerlarsimaffigisaani ingerlanneqarsinnaanngippat,
- 3) pineqartup iliuutsimi kinguneri tamakkerlugit paasisinnaanngippagit,
- 4) pineqartoq inuttut annertuumik ajoquusernissamut imminut aarlerinartorsiortippat, aamma
- 5) nuunnissaata isumagineqannginnera illorsorneqarsinnaanngippat.

Imm. 2. Inunnut tarnikkut annertuumik ataavartumillu pisinnaasakillisimasunut, najugaqarfimmi aalajangersimasumi tigutinnissamut akerliunngitsunut, nuunnissamulli paasinartumik akuersinissamut pisinnaasaqanngitsunut, tarnikkullu pisinnaasakillineq

eqqarsartaatsikkut sanngiillinermik pissuteqartup kingunerippagu, najugaqarfimmut aalajangersimasumut tigutinnissaa pillugu kommunimi angerlarsimaffigisami kommunalbestyrelse aalajangiisinnaavoq, communalbestyrelsip inassutigisaa angajoqqaatut akisussaatitaasumit eqqartuussisoqarfimmit ivertinneqartumit isumaqatigineqarpat, imattoqartillugu:

- 1) pineqartup pisariaqartitaminik ikiorneqarnissaanut najugaqarfimmi najugaqarnissaa pisariaqarpat, aamma
- 2) pisumi tassani aalajangersimasumi pineqartumut isumassuinermut atatillugu tamanna naapertuunnerpaasutut nalilerneqarpat.

Imm. 3. Pineqartup nammineq soqtigisaatut naatsorsuutigineqarpat, naak imm. 1, nr. 1-imiit 5-imut piumasaqaatit naammassineqarsimanngikkaluartut, inuup imm. 1-imi taaneqartumi najugaqarfimmi tiguneqarnikup, aamma paasinartumik akuersissuteqarnissaminik pisinnaasaqanngitsup, pisuni immikkut ittuni najugaqarfimmut assingusumut allamut nuunneqarnissaa communalbestyrelsip Naalakkersuisunut innersuussutigisinnaavaa, tassani inuup isumassorneqarnera isumagineqarsinnaalluni, matumani pineqartup qanigisaminut attaveqarnerminik attassiinnarnissaanik periarfissat eqqarsaatigineqarnerat ilanggullugu.

Imm. 4. Imm. 1 aamma 2 malillugit communalbestyrelsip naliliinerani, taamaattoqarpat uiusup nuliaasulluunniit, inooqatigisap allatigulluunniit ilaquaasup pineqartup pisariaqartitaanik ikuunnissamik nakkutilliinissamillu isumaginnissinnaajunnaarsimanera ilaatinneqassaaq.

Imm. 5. Kommunalbestyrelse najugaqarfimmi tigutinnissaq pillugu innersuussitillugu, pineqartoq angajoqqaatut akisussaatitaasoqanngippat, communalbestyrelsip namminersorsinnaanermik inatsit malillugu angajoqqaatut akisussutitaasumik ivertsisoqarnissaa pillugu najukkami eqqartuussivik qinnuigissavaa.

Stk. 6. Angajoqqaatut akisussaatitaasumit, najukkami eqqartuussivimmit ivertinneqartumit, communalbestyrelsip aalajangiinera akuerineqarsinnaanngippat, imm. 2 malillugu najugaqarfimmut aalajangersimasumut tigutinnissaq pillugu Naalakkersuisut aalajangerneqarnissaat pillugu communalbestyrelse innersuussuteqassaaq.

§ 37. Kommunimi angerlarsimaffigisami communalbestyrelsip innersuussuteqarneratigut, § 36, imm. 1 malillugu najugaqarfimmi akuersissuteqaqqaarani tigutinneq pillugu Naalakkersuisut aalajangiissapput. Kommunalbestyrelsip innersuussutaata tigunerata kingorna kingusinnerpaamik sapaatit akunnerisa 2 qaangiunneranni aalajangiisoqassaaq.

Imm. 2. Kommunimi angerlarsimaffigisami communalbestyrelsip innersuussuussutaata tigunerata kingorna kingusinnerpaamik sapaatit akunneri 2 qaangiunneranni § 36, imm. 3 malillugu najugaqarfimmi akuersissuteqaqqaarani tigutinneq pillugu Naalakkersuisut aalajangiissapput.

Imm. 3. Innersuussut tulliuttut pillugit nassuaatinik imaqassaaq:

- 1) § 36, imm. 1-imi imaluunniit § 36, imm. 3-mi piumasaqaatit eqquutsinneqarsimanerannik isumaqarnermut tunngaviusut,
- 2) pisinnaasakillisimaneq pillugu suliamut tunngatillugu uppermarsaatit pisariaqartinneqartut,

- 3) immikkut ittumi najugaqarfimmi tigutinnissaq pillugu aalajangiinissamut innersuussuteqartoqartinnagu, pineqartumut ilaqtariinnulluunniit ikiuinerit paaqqutarinninnerillu aallartinneqarsimasut neqeroorutigineqarsimasulluunniit,
- 4) illup nutaap aaqqissuunnera aamma inuttut ikiorneqarnerit, paaqqutarineqarnerit tapersorsorneqarnerit il.il, tamatuma kingorna atorneqarsinnaalersussat, aamma
- 5) inuup nammineq kiisalu qanigisaasut inuullu angajoqqaatut akisussaatitaasoqarsimaguni angajoqqaatut akisussaatitaasuata nuunneq pillugu oqaaseqaataat.

Imm. 4. Uiusoq nuliaasorluunniit allatigulluunniit qanigisaasoq, inummik suliami pineqartumik najugaqateqartoq, aalajangersagaq manna malillugu pineqartup najugaqarfimmut immikkut ittumut tigutinnissaanik inassuteqarnissamut kommunalbestyrelsip itigartitsinerata naammagittaalliuutiginissaanut pisinnaatitaaffeqarpoq. Naammagittaalliuut Isumaginninnermi Naammagittaalliuuteqartarfimmut naammagittaalliuutigineqarsinnaavoq.

Imm. 5. Politiit ikuunniisaat pisariaqartinneqartoq communalbestyrelsip nalilerpagu, najugaqarfimmi tigutinnissamik aalajangiineq piviusunngortinniarlugu communalbestyrelsip politiit ikuuteqqullugit qinnuigisinaavai.

Kapitali 15

Aalajangiullugu tigumminnинeq, inuttut eqqiluisaарneq ujatsiutillu annoraamerngit

§ 38. Timikkut pissaanermik atuineq inummik aalajangiullugu tigumminnertut ilusilik, imaluunniit inimut allamut nuutsinertut ilusilik inertequtaangilaq, imaattoqarpat:

- 1) inuup timikkut annertuumik ajoquernissamut imminut allanilluunniit ulorianartorsiortitsilernissaa ilimanavissumik aarlerinaateqarpat, aamma
- 2) pisuni ataasiakkaani pissutsit tamanna pisariaqartilluinarpasuk.

Inuttut eqqiluisaарneq

§ 39. Inuttut eqqiluisaарnermut atatillugu pineqartup isumassorneqarnissaata isumaginissaanut tamanna pisariaqarluinnartutut isigineqarpat, najugaqarfimmi aqutsisup taassumaluunniit tullersortaata inummik aalajangiullugu tigumminnertut ilusilerlugu pissaanermik atuisinnaanera, kommunimi angerlarsimaffigisami communalbestyrelsip qaqtiguinnaq aalajangersinnaavaa. Inuttut eqqiluisaарnermut atatillugu pissaanermik atuinerup siunissami pinngitsoornissaa tamatuma peqatigisaanik qulakteerniarneqassaaq.

Imm. 2. Imm. 1 malillugu timikkut pissaanermik atuineq tulliuttuni eqqiluisaartoqarnerani akuerineqarsinnaassaaq:

- 1) Kigutinik saliineq.
- 2) Unngiarneq.
- 3) Qulinneq, uffarneq atisanillu taarsiineq.
- 4) Nujaajartinneq kukiartinnerlu.
- 5) Nangernik nalequttanillu taarsiineq.

- 6) Ammimik paarsineq.
- 7) Ulussat iluini qarngullu iluani nerisat sinnikuinik piaaneq.

Imm. 3. Eqqiluisaartoqarnerani pissutsit piviusut suut aalajangiinermi pineqarnersut kommunalbestyrelsip aalajangiinerani erseqqissaatigineqassaaq.

Imm. 4. Aalajangiullugu tigumminninnermut ikiuutitut atortunik atuisoqassanngilaq, taamaattoq § 40 takuuk, aamma aalajangiullugu tigumminneriaaseq taamatullu iliornikkut anguniagaasoq imminnut naleqqiullutik atsikkutigiissittussaapput.

Imm. 5. Aalajangersagaq manna malillugu timikkut pissaanermik atuineq piffissami qaammatit pingasut tikillugit sivisussusilimmi akuerineqarsinnaavoq. Imm. 2, oqaaseqatigijit appaat malillugu communalbestyrelse piffissamik sivitsuisinnaavoq, qaammatinilli 6-inik sivisunerungitsumik, pineqartumi eqqiluisaarnikkut pissutsit pitsaanerulersinniarlugit periaatsit allat peqatigisaanik ineriartortinneqassammata.

Imm. 6. Inummi imm. 1 malillugu siusinnerusukkut aalajangiiffigineqareersimasumi, tarnikkut annertuumik ataavartumillu pisinnaasakillisimaneq suli ajorseriaateqaqqippat, pisuni eqqiluisaarnermut tunngasuni timikkut pissaanermik atuineq aalajangiullugu tigumminninnertut ilusilik, qaammatit 3 tikillugit atuuttussamik akuersissutigeqqinnejqarsinnaavoq, piffissallu taassuma qaammatit 6 tikillugit sivitsorneqarsinnaanera periarfissaavoq.

Ujatsiutinik annoraaminernik atuineq

§ 40. Inuup timimigut annertuumik ajoquusernissaa nalorninangitsumik aarlerinaateqarpat, pisunilu ataasiakkaani pissutsit tamanna pisariaqartilluinarpassuk, najugaqarfimmi aqutsisoq, taassumaluunniit tullersortaa, inuup nakkarnissaa pinngitsoortinniarlugu ujatsiutit annoraamernit atorlugit issiavimmut kaassuartakkamut allatigulluunniit ikorsiissummut, siniffimmut, issiavimmut, perusuersarfimmulluunniit aalajangerneqarsinnaanera pillugu, kommunimi angerlarsimaffigisami communalbestyrelse aalajangiisinnaavoq.

Imm. 2. Illersuiniarnermut atortut imm. 1-imut ilaatinneqartut piffissami qanoq sivisutigisumit atorneqarsinnaanerat pillugu communalbestyrelse aalajangiissaqq.

Kapitali 16

Systemit kalerrisaarutit systemilluunniit sumiiffissiutit inunnut ataasiakkaanut atugassiat

§ 41. Najugaqarfimmi aqutsisoq taassumaluunniit tullersortaa, systeminik kalerrisaarutinik systemillinluunniit sumiiffissiutinik inunnut ataasiakkaanut atugassianik piffissami killilikami atuisinnaanerat kommunimi angerlarsimaffigisami communalbestyrelsip aalajangiiffigisinnaavaa, imaattoqartillugu:

- 1) meeqqap najugaqarfimmik qimatsinermigut imminut allanilluunniit timikkut ajoquusernissamut ulorianartorsiortitsilernissaa aarlerinaateqarpat,
- 2) pisuni ataasiakkaani pissutsit aarlerinartup tamatuma pinngitsoortinnissaanut pisariaqartippassuk.

Imm. 2. Atortut inuup inigisamit qimatsineranik maluginnissinnaasut imaluunniit inuup inigisamit qimatsisimasup nassaarinissaanut atorneqarsinnaasut imm. 1 malillugu systeminik kalerrisaarutinik systeminilluunniit sumiiffissiutinik inunnut ataasiakkaanut atugassianik utaqqiisaagallartumik atuisinnaanermut aalajangiisinnaanermi taamaallaat ilaatinneqarput.

Imm. 3. Pineqartup akerlerinngippagu, inummut eqqarsartaatsikkut sanngiillisimanerup kinguneranik tarnikkut pisinnaasakillisimanerup ajorsiartortup kinguneranik pisinnaasakillisimasumut, systeminik kalerrisaarutinik systeminilluunniit sumiiffissiutinik inunnut ataasiakkaanut atugassianik atuineq aallartinneqarsinnaavoq. Inuup systeminik kalerrisaarutinik systeminilluunniit sumiiffissiutinik inunnut ataasiakkaanut atugassianik atuinissaq akerlerippagu, imm. 1 malillugu taakku atorneqarnissaat communalbestyrelsip aalajangiiffigisinnaavaa. Uniffiup aappaa malillugu aalajangiinerup piffissami killiligaanngitsumi atuunnissaa aalajangerneqarsinnaavoq. Taamaattoq suliniut pillugu aalajangiinermi piumasaqaatit atuukkunnaarpata, suliniut unitsinneqassaaq.

Kapitali 17

Aninissamut killilersuinerit

Matunik ammaassutit immikkut ittut

§ 42. Najugaqarfimmi aqutsisup, taassumaluunniit tullersortaata matunik ammaassutit immikkut ittut inummut ataatsimut arlaqartunulluunniit piffissami killilimmi atorsinnaagai kommunimi angerlarsimaffigisami communalbestyrelsip aalajangersinnaavaa, imaattoqarpat:

- 1) inuup inuilluunniit inuit arlallit najugaqarfimmit qimatsinermigut/qimatsinermikkut timikkut annertuumik imminut allanilluunniit annertuumik ajoqusiinissaa/t tutsuiginartumik aarlerinaateqarpat,
- 2) taamatut aarlerinerup pinngitsoortinnissaanut pisuni ataasiakkaani pissutsit tamanna pisariaqartilluinnarpassuk, aamma
- 3) Inatsisartut inatsisaanni periarfissat allat kinguneqanngitsumik atorneqareersimappata.

Imm. 2. Imm. 1 malillugu matunik ammaassutinut immikkut ittunut ilaapput matup tigummivii marloqiusat, matumik ammaaniarluni marloriarluni toorneqartussat assigisaallu. Suliniut imatut matumik parnaarsaataassanngilaq, pineqartulli killilersugaanani ingerlasinnaaneranut atatillugu kinguarsaataassalluni, taamaalilluni sulisut maluginiarsinnaassammassuk pineqartoq anisoq.

Imm. 3. Imm. 1 malillugu suliniut aallartinneqarpat, najugaqartut killilersugaanatik ingerlasinnaanerat mianeriniarlugu matumi kalerrisaarummik ikkussisoqassaaq, taamaalilluni najugaqartut matumik ammaassummik immikkut ittumik namminneq atuisinnaanngitsut matumik ammaanissamut pisariaqartitaminnik ikiorneqassammata. Najugaqartut imm. 1 malillugu suliniuteqarnermut ilaasut, § 41-mi aalajangersagaq tamatuma peqatigisaanik atorneqarpat aatsaat anitsaaliugaasinnaapput.

Inigisamit anitsaaliugaaneq

§ 43. Inuup inigisaminik qimatsinissaa pinngitsoortinniarlugu, imaluunniit pineqartoq inigisaanut ingerlateqqinniarlugu § 42, imm. 1-imi piumasaqaatit assigisaat piumasaqaatigalugit najugaqarfimmi aqutsisoq taassumaluunniit tullersortaa inummik aalajangiullugu tigumminnilluni pissaanermik atuisinnaasoq, kommunimi angerlarsimaffigisami communalbestyrelse aalajangiisinnavaoq.

Imm. 2. Inigisamit anitsaaliugaanerup piffissami qanoq sivisutigjumi atuunnissaa communalbestyrelsip aalajangiiffigisinnavaa.

Kapitali 18

Pulaartoqarsinnaanermut killilersuinerup il.il. malittarisassiuunneqarnera

§ 44. Inuit najugaqarfinni sulisoqartuni ininillu ataatsimoorussanik initaqartuni najugaqartut kimit pulaarneqarnissartik namminneq aalajangissavaat, taamaattoq § 45, imm. 1, aamma § 46, imm. 2 takukkit.

§ 45. Najugaqarfinni § 44-imi taaneqartuni ininut ataatsimoorussanut pulaartut ilaasa isersinnaanerat killilersorneqassasoq, kommunimi najugaqarfifigisami communalbestyrelsip aalajangersinnaavaa, imattoqarpat:

- 1) pulaartoq najugaqartunut allanut sulisunulluunniit nakuuserpat nakuusernissamilluunniit qunusaarippat, imaluunniit allatut najugaqartut sinnerinut sulisunulluunniit ulorianartorsiortsismik pissusilersuuteqarpat,
- 2) pulaartoq, timikkut nakuuserneq pineqanngikkaluartoq, najugaqartunut allanut sulisunulluunniit ajoquersuippat imaluunniit nakkarsaappat, imaluunniit
- 3) pulaartup pissusilersornera annertuumik uumitsatsitsippat imaluunniit najugaqartunut allanut sulisunullu nalinginnaasumik toqqisisimannginnermik pilersitsippat.

Imm. 2. Pulaartup inigisap ilaanut najugaqartup kisimi atorsinnaasaanut isersinnaanissaa communalbestyrelsip imm. 1 malillugu aalajangiinermini qulakkiissavaa.

§ 46. Pulaartut aalajangersimasut inip ilaanut najugaqartup kisimi atorsinnaasaanut isersinnaanerannik killiliisunik kommunimi najugaqarfifigisami communalbestyrelse aalajangiisinnaanngilaq.

Imm. 2. Taamaattoq pulaartut aalajangersimasut sulisunut § 45, imm. 1, nr. 1-imi 2-milu taaneqartunik pissusilersuuteqartut, ikuuinissamik peqqusinerup nalaani inigisap ilaani tessani najuutinnginnissaat pillugit communalbestyrelse aalajangiisinnavaoq.

§ 47. § 45, imm. 1, aamma § 46, imm. 2 malillugit aalajangiinerit, kommunimi najugaqarfifigisami communalbestyrelsip ataatsimiititalialluunniit ataavartup ataatsimiinnerani aalajangerneqassapput.

Imm. 2. Taamaattoq § 45, imm. 1 aamma § 46, imm. 2 malillugit najugaqarfimmi aqutsisoq taassumaluunniit tullersortaa aalajangiigallarsinnaavoq, soorlu massakkorpiaq

pisariaqartinneqartut imm. 1 malillugu suliap communalbestyrelsimit ataatsimiitaliamilluunniit ataavartumit suliarineqarnissaanik utaqqisinnaanngitsut eqqarsaatigalugit.

Imm. 3. Imm. 2 malillugu aalajangiigallarneq aalajangiigallarnerup atuutilersinnerata kingorna, oqartussaasumut imm. 1 malillugu aalajangiisinnatitaasumut akuerisassanngorlugu sapinngisamik piaartumik saqqummiunneqassaaq.

Imm. 4. Pulaartumut killilersuutit qanoq annertutiginerat piffissamilu qanoq sivisutigisumi atuuttussaanerat aalajangiinermi takuneqarsinnaassaaq.

Imm. 5. § 45, imm. 1 aamma § 46, imm. 2 malillugit aalajangiinerit pulaartumut najugaqartumullu aalajangiiffiussapput.

Kapitali 19

Nalunaarsuineq nalunaarutiginninnerlu

§ 48. § 36 malillugu najugaqarfimmut tigutinneq pissaanermillu atuinerit assigiinngitsut suulluunniit, matumanı §§ 38-miit 35 ilanngullugu malillugit suliniutinut atatillugu pissaanermik atuinerit ilanngullugit, aamma §§ 49-miit 51-imut malillugit najugaqarfimmit nalunaarsorneqassapput, kommunimilu najugaqarfigisami communalbestyrelsimit Naalakkersuisunullu nalunaarutigineqassallutik.

Imm. 2. Nalunaarsuinermut immersugassat immikkut ittut Naalakkersuisunit suliarineqarsimasut atorlugit nalunaarsuineq nalunaarutiginninnerlu pissaaq.

§ 49. Nalunaarsuineq erngerluni pissaaq aamma akuliinnerup pinerata aqaguani kingusinnerpaamik pissalluni ima pisoqartillugu:

- 1) Pissaanermut atuinissamut piginnaatitsisumik akuersisummik peqanngikkaanni.
- 2) Allatut ajornartumik illersuisariaqalernermut aamma illersuisinnaatitaanermut atatillugu akuliunneq pisimappat.

Imm. 2. Imm. 1 malillugu suliniutit nalunaarsorneqartut kommunimi najugaqarfigisami, kommunimilu angerlarsimaffigisami communalbestyrelsimit Naalakkersuisunut erngerluni nalunaarutigineqassapput aamma kingusinnerpaamik akuliunnerup pereersimaneranit ullut 3 iluanni nalunaarutigineqassallutik.

§ 50. Nalunaarsuineq erngerluni pissaaq aamma akuliinnerup pinerata aqaguani kingusinnerpaamik pissalluni ima pisoqartillugu:

- 1) § 38 malillugu aalajangiullugu tigumminninnermi.
- 2) § 39, imm. 1 malillugu inuttut eqqiluisaarnermi.
- 3) § 40 malillugu ujatsiutinik annoraaminermik atuinermi.
- 4) § 41, imm. 1 aamma 3 malillugit systeminik kalerrisaarutinik systeminilluunniit sumiiffissiutinik inunnut ataasiakkaanut atugassianik atuinermi.
- 5) § 42, imm. 1 malillugu matunik ammaassutinik immikkut ittunik atuinermi.
- 6) § 43 malillugu najukkamit anitsaaliugaanermi.

Imm. 2. Imm. 1 malillugu suliniutit nalunaarsorneqarsimasut kommunimut najugaqarfigisamut, kommunimut Naalakkersuisunut qaammatikkaarlugit nalunaarutigineqartassapput.

§ 51. § 36 malillugu sulinummut aallartinneqartumut nalunaarsuineq, qaammatip suliniutip aallartiffiata naanerani kingusinnerpaamik pissaaq.

Imm. 2. Imm. 1 malillugu suliniutit nalunaarsorneqarsimasut kommunimut najugaqarfigisamut Naalakkersuisunut qaammatit pingasukkaarlugit nalunaarutigineqartassapput.

§ 52. §§ 48-miit 51 ilanngullugu malillugit nalunaarsuineq, inummit akuliunnermik sulinummit aallartitsisumit, suliarineqassaaq imaluunniit inummut akuliunnermik sulinummilluunniit aallartitsisumit ilitsersuisussaatitaasumit suliarineqassalluni.

§ 53. Sullivinni kommunimiittuni, malitseqartitsinissamik pisariaqartitsinerup naliliiffigineqarnissaa siunertaralugu, immikkoortut IV, V malillugit akuliunnerit aamma inuup kiffaanngissuseqarneranut akuliunnerit allat ineriartorneri communalbestyrelsip malinnaavigissavai. Ukiemoortumik nalunaarusiaq communalbestyrelsimit saqqummiunneqartassaaq.

Imm. 2. Najugaqarfinni illersugaasuni imaluunniit ulloq unnuarlut neqeroorutini pissaanermik atuinerup inuullu nammieq kiffaanngissusaanut akuliunnerit allat pillugit ineriartorneq pillugu nalunaarusiaq ukiumoortumik Naalakkersuisunut saqqummiunneqartassaaq.

Imm. 3. Utoqqarnik paaqqinniffit pillugit pissaanermik atuinerup ineriartornera pillugu nalunaarusiaq ukiumoortumik Nunatsinni Nakorsaneqarfimmut saqqummiunneqartassaaq.

Kapitali 20

Eqqartuussissuserisumit ikiorneqarneq

§ 54. Suliaq ingerlanerani inuup eqqartuussissuserisumit, nammieq soqtigisaminik isumaginnittussamit, ikiorneqarnissaa kommunimi najugarisami communalbestyrelsip isumagissavaa, suliani makkunani:

- 1) § 36, imm. 1 malillugu najugaqarfimmi tigutinneq, imaluunniit
- 2) § 43 malillugu angerlarsimaffimmit anitsaaliugaaneq.

Imm. 2. Eqqartuussissuserisumut aningaasartuutit communalbestyrelsip akilissavai, taannalu eqqartuussisarnermik Inatsimmi kapitali 21 malillugu sulianut nammieq aningaasartutiginngisamik eqqartuussisulersuussineq pillugu malittarisassat assigisaat atorlugit aningaasarsissaaq akiliutigigallarsimasaminillu utertiffigineqarluni.

§ 55. Suliniuteqarfigineqartoq nammineerluni eqqartuussissuserisussaminik tamatigut toqqaasinnaavoq.

Imm. 2. Eqqartuussissuserisup inummit namminermit sulisussarsiarineqartup sullitamut,

taassumaluunniit uianut nulianulluunniit, qanigisaanut isumassuisuinulluunniit allanut atassuteqarnini pissutigalugu suliamut peqataasinhaassuseqarunnaannginnissaa kommunalbestyrelsip aamma Naalakkersuisut nakkutigissavaat.

Immikkoortoq V

Pinerluutillit pillugit eqqartuussivinni suliat tunngavigalugit pineqaatissiinermik naammassinninneq

Kapitali 21

Atuuffissaa

§ 56. Immikkoortoq V-mi inuit 18-ileereersimasut ulloq unnuarlu neqeroorutini inissinneqarsimasut pineqarput:

- 1) Pinerluutillit pillugit eqqartuussivinni suliat tunngavigalugit aalajangiineq eqqartuussinikkut nalunaarutigineqartoq imaluunniit tamanna pillugu eqqartuussiviup aalajangiinera tunngavigalugu inissinneqarsimasut,
- 2) tigummigallagaanermut atatillugu inissinneqarsimasut, tassani eqqartuussisarnermik inatsimmi § 361, imm. 2, nr. 3 malillugu § 359 malillugu eqqartuussivik paaqqinnittarfimmi naleqqutumiinnissaq pillugu aalajangiineranit inissinneqarsimasut.
- 3) Kalaallit Nunaanni Pinerluttulerini inatsimmi § 234 malillugu pinerluttunik Isumaginnittunit aalajangiineq malillugu inissiisarfimmi pillaammik atuinermit ulloq unnuarlu neqeroorummut nuussinikkut inissinneqartut.

§ 57. Inunnut tarnikkut pisinnaasakillisimasunut, Inuit innarluutillit tapersorsorneqarnissaannut Inatsisartut inatsisaanni kapitali 10 malillugu pinerluutillit pillugit eqqartuussivinni suliat tunngavigalugit eqqartuussinikkut aalajangiineq nalunaarutigineqartoq malillugu imaluunniit tamanna pillugu eqqartuussiviup aalajangiinera tunngavigalugu ulloq unnuarlu neqeroorummi inissinneqarsimasunut § 61, imm. 1 aamma 2, § 62, imm. 1, § 63, imm. 1, kiisalu § 64, imm. 1 malillugit akulerunnissamik aalajangiisoqarsinnaavoq.

Imm. 2. Inunnut imm. 1-imut ilaatinneqartunut § 62, imm. 3-miit 5-imut ilanngullugit aamma § 64, imm. 2 malillugit aammattaaq akulerunnissamik aalajangiisoqarsinnaavoq.

Imm. 3. Inunnut imm. 1-imi ilaatinneqartunut pulaartut pillugit § 64, imm. 7 malillugu akulerunnissamik aalajangiisoqarsinnaavoq.

Imm. 4. Inuit pinerluutillit pillugit eqqartuussivinni suliat tunngavigalugit pineqaatissiissutip atorunnaarsinneqarnerata kingorna ulloq unnuarlu neqeroorummi najugaqaannartut kapitalimi matumani ilaatinneqanngillat.

Kapitali 22

Suliassat suliarineqartarnerat pillugu malittarisassat

Oqartussaasoq

§ 58. § 61, imm. 1-imí aamma 2-mi, § 62, imm. 1, aamma 7, § 63, imm. 1-imí, aamma § 64, imm. 1-imí 2-milú akuliunnerit taaneqartut pillugit ulloq unnuarlu neqeroorummi matoqqasumi aqutsisoq taassumaluunniit tullersortaa aalajangiissaaq.

Imm. 2. Imm. 1-imí akuliunnerit taaneqartut ulloq unnuarlu neqeroorummi matoqqasumi sulisunit suliarineqarsinnaapput.

Akuliunnerup annertussusaa

§ 59. Akuliunnernut aallartinneqarsimasunut piumasaqaatit atuukkunnaaraangata akuliunnerit erngerlutik unitsinneqassapput.

Imm. 2. Aqutsisup taassumaluunniit tullersortaata, akuliunnissamik aalajangiisuusimasup, akuliunneq aallartinneqarsimasoq unitsinneqassanersoq ingerlaavartumik nalilersortassavaa.

Kapitali 23

Kalaallit Nunaanni eqqartuussisarnermik inatsit malillugu tigummigallagaanermut atatillugu inissiineq

§ 60. Inunnut innarluutilinnut tigummigallagaasunut aamma tassunga atatillugu eqqartuussisarnermik inatsimmi § 361, imm. 2, nr. 3 malillugu § 359 malillugu ulloq unnuarlu neqeroorummi inissinneqarsimasunut pulaarsinnaaneq allaffigeqatigiittarnerit il.il. pillugit eqqartuussisarnermik inatsimmi §§ 379, 380 taamatuttaaq atuupput.

Imm. 2. Ukuninnga nakkutigisaanngitsumik aallaffigeqattaannerit pulaarneqarnerillu tigummigallagaasup pisinnaatitaaffiga:

- 1) inissinneqartup najugaqarfiani- aamma angerlarsimaffittut kommuniani kommunalbestyrelsinit,
- 2) Naalakkersuisuni ilaasortanit,
- 3) Inatsisartuni ilaasortanit,
- 4) eqqartuussivimmit,
- 5) unnerluussisussaatitaasunit,
- 6) poliinit,
- 7) tigummigallagaasup illersuisuanit,
- 8) tigummigallagaasumut illersuisumit,
- 9) Inatsisartut Ombudsmandianit,
- 10) Folketingip Ombudsmandianit,
- 11) Europami Inuit pisinnaatitaaffii pillugit eqqartuussivimmit,
- 12) Europami Naalliuksitsisarneq pillugu ataatsimiititaliamit,
- 13) Utoqqaat Illersuisuannit, aamma
- 14) Inuit innarluutillit Illersuisuannit.

Imm. 3. Tigummigallagaanissaq eqqarsaatigalugu pissutsit immikkut ittut pissutigalugit politiit akerliunngippata, inuk nunamit allameersoq, nunami angerlarsimaffigisami nunanut allanut attaveqaataanik imaluunniit konsuulitut sinniisuinik nakkutigisaanngitsumik

aammattaaq aallaffigeqateqartarsinnaavoq. Imm. 1 malillugu politiit allakkanik nakkutilliinissaq aalajangersimappassuk, allakkat politiit aqqutigalugit nassiunneqassapput.

Imm. 4. Imm. 1, malillugu politiit aalajangiinerat pillugu tigummigallarneqartoq ilisimatinneqassaaq, tigummigallarneqartullu tamatuma aalajangiiffineqarnissaa pillugu eqqartuussivimmi saqqummiunneqarnissaa piumasarisinnaavaa.

Imm. 5. Ulloq unnuarlu neqeroorutip aqtsisuata imaluunniit taassuma tullersortaata imm. 1 malillugu piumasaqaatit aalajangersarneqartut pillugit ulloq unnuarlu neqeroorutip sulisuinik ilisimatitsinissaq isumagissavaa.

Kapitali 24

Akuliunnerit ataasiakkaat

Inissinneqartup internetimut oqarasuaammillu atuisinnaaneranik annikillisitsineq

§ 61. Tamanna torersuunissaq- imaluunniit isumannaatsuunissaq eqqarsaatigalugit pisariaqartinneqartutut nalilerneqarpat, matumani pinerluttuliornerup pitsaaliorneqarnissaa pinngitsoortinneqarnissaalu ilanngullugit, eqqartuussivik akuersiteeqqaarnagu inissinneqartup pisumi aalajangersimasumi oqarasuaammik internetimillu atuinera tusarnaarneqassasoq imaluunniit nakkutigineqassasoq aalajangerneqarsinnaavoq.

Imm. 2. Tamanna torersuunissaq- imaluunniit isumannaatsuunissaq eqqarsaatigalugit pisariaqartinneqartutut nalilerneqarpat, matumani pinerluttuliornerup pitsaaliorneqarnissaa pinngitsoortinneqarnissaalu ilanngullugit, eqqartuussivik akuersiteeqqaarnagu inissinneqartup oqarasuaammik internetimillu atuisinnaanerata kipitinneqarnissaa imaluunniit akornuserneqarnissaa aalajangerneqarsinnaavoq.

Imm. 3. Inissinneqartup pisortanik, eqqartuussissuserisunik, illersuisumik, angajoqqaatut akisussaatitaassusilimmik, inummik toqqammavigisamik imaluunniit illersuisunik attaveqarnera taamaattoq tusarnaarneqarsinnaanani, nakkutigineqarsinnaanani, kipitinneqarsinnaanani akornuserneqarsinnaanngilaq.

Imm. 4. Qarasaasiat, oqarasuaatit angallattakkat, qarasaasiat tigummiartakkat aamma atortut allat internetimik atuisinnaanermik periarfissiisut ulloq unnuarlu neqeroorummi matoqqasumi tamarmiusumi pigineqarnissaasa nalinginnaasumik inerteqqutigineqarnissaat Naalakkersuisut aalajangersinnaavaat. Naggat siulleq malillugu inerteqquteqartoqarpat, taava ulloq unnuarlu neqeroorummi matoqqasumi inissinneqarsimasut allatigut internetimut attaveqarsinnaanerat Naalakkersuisut isumagissavaat.

Misissuinerit

§ 62. Tamanna torersuunissaq- imaluunniit isumannaatsuunissaq eqqarsaatigalugit pisariaqartinneqartutut nalilerneqarpat, matumani pinerluttuliornerup pitsaaliornissaa pinngitsoortinneqarnissaalu ilanngullugit, ulloq unnuarlu neqeroorummi matoqqasumi inissinneqartumut inissinneqartup isersimaffigisaanik pigisaanillu eqqartuussivik aalajangiiteeqqaarnagu misissuinissaq pillugu aalajangiisoqarsinnaavoq. Inissinneqartup isersimaffigisaanik pigisaanillu misissuinermi tamatigut sulisut marluk peqataassapput.

Imm. 2. Inissinneqarsimasut inissinneqarsimasunulluunniit pulaartut pigisanik tigussaasunik, ulloq unnuarlu neqeroorummi matoqqasumi torersuunissamut isumannaatsuunissamulluunniit aarlerinartorsiortitsisinnaasunik imaluunniit nutaamik pinerluuteqarnissamut atorneqarsinnaasunik pigisaqarnissaat pinngitsoortinniarlugu, ulloq unnuarlu neqeroorutini matoqqasuni scannerit atorneqarsinnaapput.

Imm. 3. Inissinneqarsimasup pigisanik tigussaasunik, ulloq unnuarlu neqeroorummi torersuunissamut isumannaatsuunissamulluunniit aarlerinartorsiortitsisinnaasunik imaluunniit nutaamik pinerluuteqarnissamik atorneqarsinnaasumik pigisaqarnera pissutissaqartumik pasitsaanneqarpat, aarlerinermullu pissutaasoq imm. 2 malillugu scannerip atorneqarneranik matumuuna pinngitsoortinniarlugu misiliisoqareerneranik, inissinneqarsimasup timimini pigisanik tigussaasunik sunik peqarneranik ulloq unnuarlu neqeroorummi matoqqasumi inissinneqarsimasumut misissuinissaq pillugu aalajangiisoqassaaq. Sulisut minnerpaamik marluk misissuinermi peqataassapput. Misissuineq atisaajarnermik kinguneqartoq, inissinneqarsimasup suiaassuseqataanik sulisunit marlunnit taamaallaat suliarineqassaaq.

Imm. 4. Ulloq unnuarlu neqeroorummi inissinneqartumut, ulloq unnuarlu neqeroorummi torersuunissamut isumannaatsuunissamulluunniit aarlerinartorsiortitsisinnaasunik imaluunniit nutaamik pinerluuteqarnissamut atorneqarsinnaasumik allakkat imaqarnerat pasitsaanneqarpat, eqqartuussivik akuersiteqqaarnagu inissinneqartumut allakkat ammarneqarnissaat nakkutigineqarnissaallu aalajangiiffigineqarsinnaavoq. Inissinneqarsimasoq isigitillugu akuliunneq pissaaq. Taamaattoq torersuunissaq-isumannaatsuunissarluunniit eqqarsaatigalugit inissinneqartoq isigitinngikkaluarlugu akuliunneq naammassineqarsinnaavoq. Taamaattoqartillugu akuliunneq naammassineqarniartoq inissinneqartoq tamanna pillugu ilisimatinneqassaaq.

Imm. 5. Allakkat imm. 4-mi pissutsit taaneqartut pissutigalugit tunniuttariaqanngitsut utertinneqassapput, taamaattorli isumannaatsuunissaq eqqarsaatigalugu pisariaqartutut isigineqartillugu tigummigallarneqarsinnaallutik. Nassiussisoq tigumminnikkallarneq pillugu ilisimatinneqassaaq.

Imm. 6. Pisortat oqartussaasuinik, eqqartuussissuserisumik, illersuisumik, angajoqqaatut akisussaatitaasumik, inummik toqqammavigisassamik illersuisunillu inuk inissinneqarsimasoq nakkutigisaanngitsumik allaffigeqatiginnissinnaatitaavoq.

Imm. 7. Ulloq unnuarlu neqeroorummi inissinneqarsimasunut pulaartut pigisanik tigussaasunik, ulloq unnuarlu neqeroorummi torersuunissamut isumannaatsuunissamulluunniit aarlerinartorsiortitsisinnaasunik imaluunniit nutaamik pinerluuteqarnissamik atorneqarsinnaasumik pigisaqarnerat pissutissaqartumik pasitsaanneqarpat, aarlerinermullu pissutaasoq imm. 2 malillugu scannerip atorneqarneranik matumuuna pinngitsoortinniarlugu misiliisoqareerneranik, pigisat tigussaasut misissorneqarnissaat pillugit aalajangiisoqassaaq, matumanit ulloq unnuarlu neqeroorummut matoqqasumut nassarneqartut taskit poortukkallu ilanngullugit. Aammattaaq misissuinermi pulaartut qaatiguui ilaatinneqarsinnaapput. Pulaartumut inissinneqartumullu aalajangiineq nalunaarutigineqassaaq. Pulaartup anngiortumik eqquissiniarnerata pissutissaqartumik pasitsaanneqarnera, pigisat tigussaasut pulaartup timimini nassataasa misissorneqarnissaanut piumasagaataavoq.

Imm. 8. Pigisat tigussaasut imm. 7 malillugu nassaarineqartut, aamma ulloq unnuarlu neqeroorummi akuerisaanngitsut, pulaarnerup nalaani tigummigallarneqarsinnaapput inimilu imaluunniit sikaavimmi parnaaqqasumi toqqorneqassallutik kiisalu pulaartup ulloq unnuarlu neqeroorut qimalerpagu pineqartumut tunniunneqassallutik. Imm. 2 malillugu scannerip atorneratigut pigisanut tigussaasunut nassaarineqartunut tamanna aamma atuuppoq.

Inissinneqartup pigisaanik pigisanik tigussaasunik arsaarinninneq

§ 63. Tamanna torersuunissaq- imaluunniit isumannaatsuunissaq eqqarsaatigalugu pisariaqartinneqartutut nalilerneqarpat, illoq unnuarlu neqeroorummi matoqqasumi inissinneqartumut eqqartuussivik akuersiteeqqaarnagu pigisat tigussaasut, inissinneqarsimasumit pigineqartut, arsaarinnissutigineqarsinnaapput, matumani pinerluuteqarnissap pitsaaliorneqarnissaa imaluunniit pinngitsoortinnejarnissaa ilanngullugit.

Imm. 2. Pigisat tigussaasut inissinneqarsimasup pigisai arsaarinnissutigineqarpata, pigisat tigussaasut arsaarinnissutigineqartut pillugit sulisut allattuivimmik suliaqassapput. Arsaarinninneq pillugu inissinneqartoq ilisimatinnejarnissaaq allattuiffiullu assilineranik tunniussiffigineqassalluni.

*Inissinneqartup inigisaanik unnuakkut parnaarsineq aamma inimut assiaquersukkamut
inissiineq*

§ 64. Ulloq unnuarlu neqeroorummit matoqqasumit inissinneqartup qimaanissaa ilimanavissumik aarlerinaateqartillugu, eqqartuussivik akuersiteeqqaarnagu ulloq unnuarlu neqeroorummi matoqqasumi inissinneqarsimasup unnuakkut nalunaaquttap akunneri 8 tikillugit piffissami nal. 21.00-ip 08.00-illu akornanni inimini parnaarunneqarsinnaasoq aalajangerneqarsinnaavoq.

Imm. 2. Inissinneqartoq imminut allanulluunniit ajoqsiinissa ilimanavissumik aarlerinaateqartillugu, ulloq unnuarlu neqeroorummi matoqqasumi inissinneqartup inimut assiaquersukkamut inissinneqarnissaa aalajangiunneqarsinnaavoq. Inissiineq sapinngisamik sivikinnerpaatinnejarnissaaq nalunaaquttallu akunneri 2 sinnerlugit pissanani.

Imm. 3. Imm. 1 aamma 2 malillugit akuliunnissaq pillugu aalajangiinermi piumasagaataapput:

- 1) akuliunneq illersorneqarsinnaassasoq aamma inissinneqarsimasup peqqissusaanut kinguneqassanngitsoq,
- 2) inissinneqarsimasup imminoornissaminik navianartorsiunnginnera,
- 3) inissinneqarsimasup inigisaminit inimilluunniit assiaquersukkamit sulisunik aggeqqusinnaaneranik periarfissaqarnera,
- 4) inissinneqarsimasoq anartarfiliarnissamut imermillu pisinnaanissaminut inimini inimilluunniit assiaquersukkamit periarfissaqarnera, aamma
- 5) pineqartup piffissami parnaarunneqarnerata nalaani akulikitsumik nakkutigineqarnera aallartinnejarnissaaq.

Kapitali 25

Nalunaarsuineq nalunaarutiginninnerlu

§ 65. § 61, imm. 1 aamma 2, aamma § 62, imm. 1, 62, imm. 3, 62, imm. 4, 62, imm. 7, § 63, imm. 1, aamma § 64, imm. 1 aamma 2 malillugit akuliunnerit tamarmik aallartinneqartut aallartinneqarsimasulluunniit, nalunaaquttap akunneri 24 qaangiutsinnagit nalunaarsorneqassapput. Ulloq unnuarlu neqeroorummi matoqqasumi aqutsisup taassumaluunniit tullersortaata, pissutissaqanngitsumik uninnganani nalunaarsuineq Naalakkersuisut nalunaarutigissavaat. Nalunaarsuineq paasissutissanik tullinnguuttunik imaqassaaq;

- 1) Inissinneqarsimasup aqqa.
- 2) Piffissap qanoq ilinerani akuliunnerup pisimanera.
- 3) Akuliunnerup sivisussusia.
- 4) Akuliunnerup suussusia.
- 5) Akuliunnermut pissutaasoq.

Imm. 2. Inissinneqarsimasoq akuliuffigineqartoq akuliuffigineqarsimasorluunniit, nalunaarutiginnineq pillugu ilisimatinneqassaaq, misissuinerlu pillugu nammineq nalunaarusiaminik ilanngussinissaminut periarfissinneqassalluni. Inissinneqarsimasoq nalunaarutiginnineq pillugu nammineq oqaaseqaatimi naammassinissaanut illersuisumit, inummit toqqisisimaffigisamit isumassuisumilluunniit, ulloq unnuarlu paaqqinnittarfimmi sulisumit, pisumi akuusimanngitsumit ikiorneqarnissamik neqeroorfingineqassaaq.

Imm. 3. § 62, imm. 7 malillugu pulaartumik misissuinerup nalunaarsorneqarnera aammattaaq pulaartup aqqanik imaqartinneqassaaq.

Imm. 4. Ulloq unnuarlu neqeroorummi aqutsisup taassumaluunniit tullersortaata qaammatip naanerani oqaaseqaatiminik ilallugit nalunaarsuinerit assilineqarneri imm. 1 malillugu kommunimut najugaqarfigisamut, kommunimut angerlarsimaffigisamut Naalakkersuisunullu nassiutissavai.

Immikkoortoq VI

Naammagittaalliorsinnaaneq

Kapitali 26

Naammagittaalliorsinnaatitaasut

§ 66. Pineqartoq nammineerluni naammagittaalliorsinnaanngippat, angajoqqaatut akisussaatitaasoq, inuk toqqammavigisassaq, aapparisaq, qanigisaq imaluunniit inummut akuliuffigineqartumut sinniisuuusoq alla, aalajangiineq pillugu naammagittaalliorsinnaavoq.

Kommunalbestyrelsimut naammagittaalliuuteqarneq

§ 67. Ulloq unnuarlut paaqqinnittarfimmi imaluunniit najugaqarfimmi aqutsisup taassumaluunniit tullersortaata aalajangiinera, kommunimi najugaqarfigisami kommunalbestyrelsimit naammagittaalliuutigineqarsinnaavoq.

§ 68. Naammagittaalliuutigineqartup aalajangiiffigineqannginnerani kommunimi najugaqarfigisami kommunalbestyrelsip Naalakkersuisut oqaaseqaateqaqqullugit qinnuigissavaa. Qinnuigininnermut ilaattillugu sulisumit naammagittaalliuuteqarneq pillugu pissutsinik ilisimasaqartumit nalunaarusiaq ilanngullugu nassiunneqassaaq.

Iimmersugassamut nalunaarsuisoqarsimappat, taanna nalunaarusiamut ilanngunneqassaaq.

Imm. 2. Ulloq unnuarlut paaqqinnittarfimmi imaluunniit najugaqarfimmi aqutsisoq taassumaluunniit tullersortaa tamatuma saniatigut tuaviornerpaamik misissussaaq, misissuinerlu eqqunngitsuliorfigineqartumik oqaloqatiginninnermik sulisunillu naammagittaalliuuteqarneq pillugu pissutsinik ilisimasalinnik kiisalu takunnittoqarsimappat takunnittunik oqaloqatiginninnermik ilaqtinnejqassaaq.

Imm. 3. Oqaloqatiginninnerit taakku pillugit nalunaarusiortoqassaaq, nalunaarusiarlu paasissutissanik imm. 1-imi taaneqartunik ilalerlugu, aqutsisup innersuussutaanik ilallugu kommunimi najugaqarfigisami kommunalbestyrelsimit nassiunneqassaaq.

Isumaginninnermi Naammagittaalliuuteqartarfimmum naammagittaalliuuteqarneq

§ 69. Kommunalbestyrelsip aalajangigaa isumaginnittoqarfiup aqunneqarnera aaqqissuunneqarneralu pillugit inatsisit qaqugukkulluunniit atuuttut malillugit Isumaginninnermi Naammagittaalliuuteqartarfimmum naammagittaalliuutigineqarsinnaavoq.

§ 70. Aalajangersakkat tulliuttut malillugit Naalakkersuisut aalajangiinerat:

- 1) § 36, imm. 1 malillugu § 37, imm. 1 malillugu najugaqarfimmi aalajangersimasumi tigutinneq pillugu,
- 2) § 36, imm. 3 malillugu § 37, imm. 2 najugaqarfimmi aalajangersimasumi tigutinneq pillugu, imaluunniit
- 3) § 36, imm. 6 malillugu § 36, imm. 2 malillugu aalajangiineq isumaginnittoqarfiup aqunneqarnera aaqqissuunneqarneralu pillugit inatsisit qaqugukkulluunniit atuuttut malillugit Isumaginninnermi Naammagittaalliuuteqartarfimmum naammagittaalliuutigineqarsinnaavoq.

Imm. 2. Imm. 1 aalajangiinernut taaneqartunut naammagittaalliuuteqarsinnaapput inuk aalajangiinermi pineqartoq, imaluunniit kommunalbestyrelse aalajangiineq pillugu naammagittaalliuuteqarsinnaasoq.

Imm. 3. Imm. 1 malillugu Isumaginninnermi Naammagittaalliuuteqartarfimmum naammagittaalliuut kinguartitsissutit sunniuteqarpoq. Pissutsit immikkut ittut pisariaqartippassuk, aalajangiinerup peqatigisaanik akuersissuteqaqqaarani najugaqarfimmum nuutinnejqarnissamik suliaq ingerlaannaq aallartinnejqassasoq aalajangerneqarsinnaavoq. Kinguartitsissutit sunniutip atorunnaarsinneqarnissaa pillugu aalajangiineq

Isumaginninnermi Naammagittaalliuuteqartarfimmut naammagittaalliuutigineqarsinnaanngilaq.

Aalajangiinerup eqqartuussivimi misilinneqarnera

§ 71. Isumaginninnermi naammagittaalliuuteqartarfip aalajangiinerani makku pineqarpata;

- 1) § 43 malillugu inigisamit il.il. anitsaaliugaaneq, imaluunniit
- 2) § 36 malillugu najugaqarfinni immikkut ittuni tigutinneq,

Isumaginninnermi Naammagittaalliuuteqartarfip aalajangiussai eqqartuussisarnermik inatsimmi kapitali 28 malillugu eqqartuussivimmut naammagittaalliuuteqartup saqqummiussinnaavai.

Immikkoortoq VII
Atuutilerfia ikaarsaariarnermilu malittarisassat

Kapitali 27
Atuutilerfia

§ 72. Inatsisartut inatsisaat 1. januar 2023 atuutilissaaq.

Imm. 2. Tamatuma peqatigisaanik Isumaginninnermik suliassaqarfimmi pissaanermik atuineq pillugu Inatsisartut inatsisaat nr. 1, 21. november 2013-meersoq atuunneqarunnaartissaq.

Ikaarsaariarnermi malittarisassat

§ 73. Pissutsinut Inatsisartut inatsisaata atuutilinnginnerani aallartinneqarsimasunut Inatsisartut inatsisaat manna atuutinngilaq.

Imm. 2. Pissutsit Inatsisartut inatsisaata atuutilinnginneranni pisimasut, Isumaginninnermik suliassaqarfimmi pissaanermik atuineq pillugu Inatsisartut inatsisaat nr. 1, 21. november 2013-meersoq malillugu suliarineqassapput.

Kalaallit Nunaanni Namminersorlutik Oqartussat, ulloq xx.xxx 2022

Naalakkersuisut siulittaasuat